

UGOVOR

za I fazu radova izgradnje i opremanja tramvajskih stajališta za kontrolisanu naplatu karata i uvođenje elektronskog sistema naplate

Ugovorne strane:

KANTON SARAJEVO

Ministarstvo saobraćaja

ul. Reisa Džemaludina Čauševića br.1

koju zastupa Ministar Mujo Fišo

u daljem tekstu: Ugovorni organ i/ili Naručioc

i

Vodeći partner Konzorcija "BS Telecom Solutions" d.o.o. Sarajevo

i "Euro-asfalt" d.o.o. Sarajevo

"BS Telecom Solutions" d.o.o. Sarajevo

ul. Branilaca Sarajeva br.20, Sarajevo

koga zastupa: Direktor- Mirza Varatanović,

u daljem tekstu: Izvođač

I OPŠTE ODREDBE

Član 1.

(1) Na osnovu Zakona o javnim nabavkama Bosne i Hercegovine („Službeni glasnik BiH“ broj 39/14), obavještenja o nabavci br.1242-1-3-15-3-20/18 i Tenderske dokumentacije br. 04-14-27935 za nabavku radova- izgradnja i opremanje tramvajskih stajališta za kontrolisanu naplatu karata i uvođenje elektronskog sistema naplate, objavljene na portalu javnih nabavki dana 16.07.2018. godine, proveden je otvoreni postupak javne nabavke sa međunarodnom objavom. Izvođač je dostavio Ponudu br. 04-14-31023 od 30.08.2018.godine, (daljem tekstu: Ponuda) čiji dijelovi čine sastavni dio ovog Ugovora. Dostavljena Ponuda u potpunosti odgovara tehničkim specifikacijama iz Tenderske dokumentacije koje su sastavni dio ovog Ugovora.

(2) Ugovorni organ je na osnovu ponude Izvođača i Odluke o izboru najpovoljnijeg ponuđača br:04-14-27935-10/18 od 01.10.2018. godine, izabrao Izvođača za nabavku radova izgradnja i opremanje tramvajskih stajališta za kontrolisanu naplatu karata i uvođenje elektronskog sistema naplate, te sa istim potpisao Okvirni sporazum br: 04-14-27935-11 od 19.10.2018. godine (u daljem tekstu: Okvirni sporazum)

(3) Finansiranje će se vršiti na osnovu Zakona o izvršavanju budžeta Kantona Sarajevo za 2018. i 2019. godinu.

(4) Naručitelj garantuje Izvođaču da su se stekli uslovi za zaključenje Ugovora za I fazu u skladu sa potpisanim Okvirnim sporazumom, te da su sredstva za realizaciju ugovora predviđena u budžetu za 2018. godinu. Obzirom da će se dio ugovora realizovati u 2019. godini zbog rokova utvrđenih ovim ugovorom i da aprecijacija za budžet za 2018.godinu ističe 31.12.2018. godine, naručilac preuzima obavezu obezbjeđenja preostalih sredstava dovoljnih za realizaciju ugovora u budžetu za 2019. godinu. Ukoliko se u toku realizacije ugovora utvrdi suprotno, Izvođač stiče pravo na naknadu štete i raskid Ugovora.

II DEFINICIJE I POJMOVI KOJI SE KORISTE U UGOVORU

Član 2.

(1) **Source code** je izvori kod aplikacija koje su predmet instalacija iz ovog ugovora, a radi se o šifriranim kodovima kojim se aktiviraju i mijenjaju performanse predmetnih aplikacija iz Tenderske dokumentacije. Izvorni kod je temeljna komponenta računalnog programa koji je stvorio programer kao autor, a za čije korištenje i raspolaganje je ovlašten Izvođač.

(2) **Tenderska dokumentacija**- odnosi se na tendersku dokumentaciju br: 04-14-27935 za nabavku radova- izgradnja i opremanje tramvajskih stajališta za kontrolisanu naplatu karata i uvođenje

elektronskog sistema naplate, objavljene na portal javnih nabavki dana 16.07.2018. godine, na koju dokumentaciju je Izvođač dao ponudu br: 04-14-31023 od 30.08.2018. godine.

(3) **Okvirni sporazum**- ugovor koji je zaključen između Naručioca i Izvođača u konzorciju sa Euro-asfaltom d.o.o. Sarajevo radi izvođenja radova izgradnje i opremanja tramvajskih stajališta za kontrolisanu naplatu karata i uvođenje elektronskog sistema naplate br: 04-14-27935-11 od 19.10.2018. godine

(4) **I faza radova** – obim i vrste radova koji su opisani kao faza I u tenderskoj dokumentaciji

(5) **Pravo korištenja Source code-a**- pravo na raspolaganje, korištenje i izmjenu izvornog koda, na način i pod uslovima kako je to predviđeno tenderskom dokumentacijom i ovim ugovorom.

(6) **Projekat**- izgradnja i opremanje tramvajskih stajališta za kontrolisanu naplatu karata i uvođenje elektronskog sistema naplate pod uslovima i na način kako je to predviđeno u tenderskoj dokumentaciji.

(7) **Gradilište**- lokacija na kojoj će se vršiti instalacija aplikacija koje su predmet ovog ugovora u skladu sa Okvirnim sporazumom i tenderskom dokumentacijom.

(8) **Dinamički plan**- dodatak na ovaj ugovor koji čini njegov sastavni dio i koji definiše obim i dinamiku radova, radova po utvrđenoj dimanici radova, predviđa obezbjeđenje, način plaćanja i postupka aktiviranja uslova obezbjeđenja predviđenih ovim ugovorom. Dinamički plan će biti potpisan u obliku aneksa.

III PREDMET UGOVORA

Član 3.

(3) Predmet Ugovora je I faza izvođenja radova izgradnje i opremanja tramvajskih stajališta za kontrolisanu naplatu karata i uvođenje elektronskog sistema naplate, a u skladu sa tenderskom dokumentacijom br: 04-14-27935 i ponudom Izvođača br: 04-14-31023 od 30.08.2018. godine (u daljem tekstu: Predmet ugovora).

(2) Ugovor obuhvata radove predviđene I fazom iz Obrasca za cijenu ponude (Prilog ovog Ugovora).

IV VRIJEDNOST UGOVORA

Član 4.

(1) Ukupna vrijednost radova i usluga, materijala i opreme koji su predmet ovog Ugovora iznosi:

Iznos bez PDV-a)..... **6.081.251,63 KM;**

Iznos PDV- a**1.033.812,78 KM**

Ukupno sa PDV.....**7.115.064,41 KM**

Slovima: (sedammilionastotinupetnaesthiljadazešdesetčetiri i 41/100 KM).

(2) U navedenu cijenu uključeni su svi troškovi za korištenje zemljišta za organizaciju gradilišta, za privremene priključke gradilišta na komunalnu infrastrukturu, za prekomjerno korištenje saobraćajnica, troškovi pripremnih radova i iskolčenja objekta, privremenog uvoza i izvoza opreme, alata i materijala za izvođenje usluga i radova, zatim svi troškovi rada, materijala i opreme, rada mašina, transporta, pomoćnih poslova, ispitivanje i dokazivanje kvalitete, troškovi geodetskog snimanja izvedenog objekta, katastra podzemnih instalacija, te takse, porezi, plate, režijski troškovi, troškovi osiguranja, kao i svi troškovi izrade projektne dokumentacije i svi drugi izdaci za izradu projektne dokumentacije i svi drugi izdaci Izvođača za završetak radova do potpune funkcionalnosti i primopredaje objekta Naručiocu na upotrebu.

(3) Cijena je formirana na bazi vrste i količine robe, usluga i radova iz priloga ovog Ugovora – obrazac za cijenu ponude (Raspored cijena) i Predmjer i predračun radova. Ugovor za kompletno ponuđene robe, usluge i radove je na bazi fiksnih jediničnih cijena.

(4) Pored stavki iskazanih u prilogu ovog Ugovora – obrazac za cijenu ponude, ukupna cijena iz ugovora uključuje i sav sitni nespacificirani materijal i opremu, te usluge i radove potrebne za dovođenje objekta u funkcionalno stanje.

V USLOVI I NAČIN PLAĆANJA:

Član 5.

(1) Plaćanje ukupno ugovorenog iznosa izvršiti će se bezgotovinski, prenosom sredstava na račun Izvršioca po ispostavljenim ovjerenim konačnim mjesečnim situacijama za ugrađenu opremu i izvedene radove koje se sastavljaju u skladu sa opisom materijala, opreme, usluga i radova u Obrascu za cijenu ponude, u roku od trideset (30) dana od ovjere situacije od strane nadzornog organa.

Plaćanje će biti izvršeno kroz mjesečne i privremene situacije dok će konačan obračun radova biti izvršen i ispostavljen po ovom ugovoru kroz konačnu situaciju, a na osnovu slijedećih dokumenata:

- o Građevinski dnevnik, ovjeren od strane Nadzornog organa,
- o Građevinska knjiga, ovjerena od strane Nadzornog organa,
- o Zapisnici o prijemu materijala i opreme,
- o Potvrde o porijeklu robe,
- o Zapisnik o primopredaji,
- o Projektna dokumentacija izvedenog stanja.

(2) Obračun i naplata ugovorne kazne iz ovog ugovora izvršiti će se umanjnjem računa Izvođača za vrijednost obračunate kazne.

(3) Sve dokumente za plaćanje i garantne dokumente nasloviti i dostaviti na adresu: Ministarstvo saobraćaja Kantona Sarajevo, Ul. Reisa Džemaludina Čauševića br. 71 71000 Sarajevo.

VI FINANSIJSKE GARANCIJE

Član 6.

(1) Garancija za uredno izvršenje ugovora: Izvođač se obavezuje da u roku od 10 dana od dana potpisivanja ugovora Naručiocu preda bankarsku garanciju na iznos od 10% (deset posto) ukupne vrijednosti ugovora bez PDV-a, kao garanciju za uredno izvršenje ugovora sa klauzulom plativo na prvi pisani poziv korisnika garancije i bez prava prigovora, sa rokom važnosti 24 mjeseca od dana krajnjeg roka za završetak radova pojedinačnog ugovora, naznačenog u pojedinačnom ugovoru, plus šezdeset dana, što ukupno iznosi 970 (devetstotinasedamdeset) dana. Ukoliko Izvođač ne dostavi garanciju za uredno izvršenje ugovora u ostavljenom roku nakon zaključivanja ugovora, ugovor se smatra apsolutno ništavim, a prijedlog ugovora Ugovorni organ dostavlja drugorangiranom ponuđaču (ukoliko on postoji, a u slučaju da nema drugorangiranog ponuđača, poništava se postupak javne nabavke), izuzev kada je do kašnjenja došlo usljed dejstva više sile ili iz drugog opravdanog razloga (uticaja objektivnih okolnosti) kojeg će Ugovorni organ cijeliti u svakom konkretnom slučaju na osnovu podnesenih dokaza.

(2) Bankarske garancije moraju biti neopozive, bezuslovne, plative na prvi poziv, bez prava na prigovor i primjedbe, prema modelu datom u tenderskoj dokumentaciji.

(3) Ako Izvođač ne dostavi Garanciju za uredno izvršenje ugovora u roku iz stava 1. ovog člana, Naručilac zadržava pravo da jednostrano raskine Ugovor i izvrši naplatu Garancije za ozbiljnost ponude, osim ako razlog zbog kojeg nije dostavljena Garancija iz stava 1. ovog člana nije proizilazi zbog nastupanja više sile ili drugih opravdanih razloga.

(4) Naručilac će sredstva iz finansijskih garancija naplatiti zbog neizvršenja, zakašnjenja ili neurednog izvršavanja ugovornih obaveza Izvođača. Ako iznos garancije za uredno izvršenje ugovora nije dovoljan da pokrije nastalu štetu Naručiocu, Izvođač je dužan platiti i razliku do punog iznosa pretrpljene štete. Postojanje i iznos štete Naručilac mora da dokaže.

(5) Naručilac nema pravo aktivirati sredstva osiguranja iz stava 1. ovog člana ako neizvršenje, zakašnjenje ili neuredno izvršavanje ugovornih obaveza Izvođača nije učinjeno njegovom krivicom, već krivicom Naručitelja. Ukoliko se ipak aktiviraju sredstva osiguranja, usprkos nedostatku krivice Izvođača, Naručilac odgovara za nastalu štetu po principu objektivne odgovornosti.

VII ROKOVI

Član 7.

(1) Rok za izvođenje radova iz člana 3. Ugovora je do 180 kalendarskih dana od dana obostranog potpisivanja Ugovora i uvođenja Izvođača u posao.

2) Dan uvođenja Izvođača u posao predstavlja dan kada je načinjen Zapisnik o uvođenju u posao između Naručioca i Izvođača i kada je Izvođaču predata investiciono tehnička dokumentacija definisana u tenderskoj dokumentaciji. Uvođenje Izvođača u posao će se obaviti najkasnije 7 dana od dana obostranog potpisivanja ugovora. Dan početka radova će se konstatovati upisom u građevinski dnevnik. Zapisnik o uvođenju u posao i Zapisnik o primopredaji investiciono tehničke dokumentacije sa danom potpisivanja čine sastavni dio ugovora.

(3) Datum završetka radova je datum naveden u Zapisniku o primopredaji izvedenih radova.

(4) Plan izvršenja ugovora (detaljan dinamički plan) Izvođač će napraviti prije početka izvođenja radova, uz saglasnost Naručioca. Dinamički plan postaje sastavni dio ugovora kada ga potpišu ugovorne strane.

(5) Ukoliko Naručitelj ne odobri predloženi Dinamički plan dužan je predložiti izmjene i dopune istog, u suprotnom predloženi dinamički plan se smatra odobrenim. Naručilac je dužan dati saglasnost na Dinamički plan i dati prijedlog u roku od 7 dana, pod prijetnjom gubitka tog prava. Ukoliko su prijedlozi izmjena Dinamičkog plana od strane Naručioca u suprotnosti sa Tenderskom dokumentacijom, Izvođač može odbiti postupanje po istom i tražiti raskid Ugovora.

(6) Ugovorne strane su saglasne da se ugovorni rok automatski produžava za vrijeme kašnjenja ili smetnji, ako su iste nastale zbog više sile, ili iz drugog opravdanog razloga.

(7) Izvođač u okviru roka iz stava (1) ovog člana mora blagovremeno dostaviti izvedbeni projekat za 9 tramvajskih stajališta, izvedbeni projekat optičkog kabla i izvedbeni projekat sistema elektronske naplate karata sa projektom upravljanja javnim gradskim prevozom Naručiocu radi interne revizije, izvršiti eventualne izmjene projekta prema zahtjevima Naručioca.

(8) Naručilac će odobreni projekat za devet tramvajskih stajališta, projekat optičkog kabla i projekat sistema elektronske naplate karata sa projektom upravljanja javnim gradskim prevozom od strane interne revizije Naručioca dostaviti revidentu ovlaštenom za reviziju, a Izvođač je dužan da ukloni eventualne primjedbe te nakon otklanjanja primjedbi sa revizije konačnu verziju revidovanog Glavnog projekta dostaviti Naručiocu.

Član 8.

Izvođač je dužan pridržavati se ugovorom utvrđenih rokova i operativnog plana. Izvođač ima pravo produženja ugovorenih rokova u sljedećim slučajevima:

- Zbog izmjene investicijsko-tehničke dokumentacije,
- Zbog dodatnih radova, izvedenih na pisani zahtjev Naručioca,
- Ako Naručilac kasni s odgovorima na Izvođačeva upozorenja i zahtjeve iz ovog ugovora pa zbog toga ne može nastaviti gradnju;
- Usljed više sile, što podrazumjeva vanredne vanjske događaje ili pojave, te prirodne događaje (poplave, potres)
- Ljudske radnje koje se nisu mogle predvidjeti, izbjeći ili ukloniti;
- Mjere predviđene organima nadležnih tijela.

Član 9.

(1) Danom dovršavanja ugovorenih radova smatra se dan uspješno obavljene primopredaje radova. Ako se primopredaja ne može obaviti u zakazanom roku iz razloga za koje izvođač nije odgovoran, dan dovršenja ugovorenih radova smatra se zajednički planiran datum primopredaje.

(2) Primopredaja se smatra uspješno obavljenom ako u zapisniku nema uslovnih primjedbi na ugovorom predviđene radove.

VIII NADZOR

Član 10.

(1) Stručni nadzor za izvođenje radova vrši Zavod za izgradnju Kantona Sarajevo.

(2) Nadzor nad izvođenjem radova sastoji se od kontrole ispunjavanja ugovornih obaveza izvođača radova i poduzimanja odgovarajućih mjera za realizaciju tih obaveza. Nadzor u pogledu ispunjenja ugovornih obaveza se sastoji osobito od kontrole:

- količina radova,

- održavanja rokova izvođenja radova,
- opreme koja se ugrađuje u skladu sa tehničkim specifikacijama
- izvođenje radova prema tehničkoj dokumentaciji,
- kvalitete radova.

(3) Nadzorni inženjer ima pravo pristupa na gradilište, u radionice, pogone, skladišta materijala i drugo, u svrhu obavljanja nadzora.

(4) Naručilac je obavezan da obavijesti Izvođača o imenovanom nadzoru, nadzornim inženjerima i to u roku ne dužem od sedam dana od dana potpisivanja ovoga Ugovora. Način obavještanja o imenovanom nadzoru i nadzornom inženjeru mora biti pisanim putem na način i pod uslovima kako je komunikacija između Ugovornih strana predviđena u ovom Ugovoru.

Član 11.

(1) Nadzorni inženjer ima pravo uvida u svu potrebnu dokumentaciju u okviru kontrole ispunjenja ugovornih obaveza izvođača.

(2) Nadzorni inženjer ima pravo naložiti da se u primjerenom roku otklone svi uočeni nedostaci, kao i naložiti obustavu izvođenja pojedinih radova koji se izvode nekvalitetno ili na drugi način odstupaju od odredbi ugovora, ako bi nastavljanje izvođenja tih radova, moglo izazvati teže posljedice. Nadzorni inženjer može naložiti i rušenje, odnosno, otklanjanje pojedinih nekvalitetnih radova ili onih koji na drugi način bitno odstupaju od ugovora ako se ti radovi ni naknadno ne mogu uskladiti sa zahtjevima ugovora. Nadzorni inženjer može zabraniti ugradnju opreme ili demontiranje iste koja nije u skladu sa tehničkim specifikacijama.

(3) Nadzorni inženjer može u slučaju potrebe, a u svrhu zaštite života i zdravlja trećih lica i / ili za opću javnu sigurnost, potom, zbog zaštite izvedenih radova i drugih materijalnih dobara, naložiti izvođaču da izvede potrebne radove i poduzme mjere koje su po njegovoj ocjeni neophodne za otklanjanje opasnosti.

(4) Nadzorni inženjer nema pravo naručiti radove koji nisu ugovoreni, mijenjati cijene, ili osloboditi izvođača od pojedinih ugovorenih obaveza, ukoliko za to nema pisano ovlaštenje od naručioca.

(5) Nadzorni inženjer može u slučaju potrebe, a u svrhu zaštite života, izvedenih radova i drugih materijalnih dobara narediti izvođaču da izvede potrebne radove i poduzme mjere koje su po njegovoj ocjeni neophodne za otklanjanje opasnosti.

Izvođač je dužan provesti nalog nadzornog inženjera.

(6) Nadzor se provodi svakodnevno, a dinamika i ažurnost nadzora mora biti u skladu s dinamikom izvođenja radova.

(7) Propusti nadzornog inženjera u provođenju nadzora ne oslobađaju izvođača od odgovornosti, osim ako su takvi propusti direktno povezani sa dinamičkim planom.

(8) Ukoliko neažurnost nadzora dovede u pitanje Dinamički plan Izvođača, Izvođač će odmah o tome obavijestiti Naručioca, koji je dužan odmah, a najkasnije u roku od 7 (sedam) dana da izvrši intervenciju na način da naloži Nadzoru da ažurira svoje aktivnosti. Ukoliko krivnjom nadzora opet dovede u pitanje Dinamički plan Izvođača, Izvođač ima pravo da traži produženje trajanja ugovora.

Član 12.

(1) Ukoliko izvođač ima primjedbi na rad nadzornog inženjera, ili se smatra oštećenim nekom njegovom odlukom, ima pravo da o tome obavijesti naručioca koji će razmotriti date primjedbe i o tome donijeti odluku u roku od tri dana od dana zaprimanja obavijesti od Izvođača na način i pod uslovim kako je predviđeno u ovom ugovoru.

(2) U provođenju nadzora nadzorni inženjer je dužan postupati u skladu s važećim propisima.

Član 13.

(1) Izvođač ne smije odstupiti od projekta, osim u slučaju da se s tim Naručilac pismeno saglasi.

(2) Ako Izvođač odstupa od projekta bez pismene saglasnosti Naručioca, nema pravo na povećanje ugovorene cijene za radove što ih je izveo bez takve saglasnosti, osim ako su takva odstupanja bile takve prirode da su zahtijevala hitnu intervenciju. U tom slučaju Naručilac može za njih dati naknadno odobrenje i u slučaju potrebe produžiti rokove za izvođenje radova.

hno

(3) Izvođač može izvesti nepredviđene radove bez prethodne saglasnosti Naručioca ako zbog njihove hitnosti nije mogao pribaviti tu saglasnost. Nepredviđenim radovima smatraju se radovi koji su bili nužno potrebni da bi se osigurala stabilnost objekta, bezbjednost ljudi ili spriječio nastanak bilo kakve štete čiji uzrok je neočekivana pojava vode ili drugi izvanredni i neočekivani događaj.

Član 14.

(1) Materijal i potrebna oprema za izvođenje I faze radova iz člana 3. Ugovora moraju odgovarati standardima, odnosno moraju biti odgovarajuće kakvoće, a u skladu sa Tenderskom dokumentacijom.

(2) Prilikom dostave materijala, Nadzorni inženjer je isti dužan pregledati i dati odobrenje, u suprotnom Naručilac gubi prava na prigovore na dostavljeni materijal.

(3) Izvođač garantuje da u trenutku isporučivanja opreme i izvođenja radova nije zatajio ili prešutio bilo koji sakriveni nedostatak ili manu za isporučenu i ugrađenu robu, odnosno za izvedene radove.

(4) Ukoliko se utvrdi da su isporučena i ugrađena roba, kao i izvedeni radovi imale sakrivene nedostatke ili mane za koje je Izvođač znao ili morao znati, Naručioc stiče pravo da kroz aktiviranje bankovne garancije izvrši naplatu nastale štete, te ukoliko nastala šteta prelazi iznos bankovne garancije, Naručilac stiče pravo da naplatu štete izvrši do visine stvarno utvrđene štete.

IX UGOVORNA KAZNA

Član 15.

(1) U slučaju prekoračenja roka za završetak radova, Izvođač se obavezuje da Naručiocu plati ugovornu kaznu u visini od 3% (tri promila) od ukupne vrijednosti ugovorenih poslova bez PDV-a za svaki kalendarski dan prekoračenja roka iz člana 7. ovog Ugovora. Ugovorna kazna se obračunava od prvog dana poslije isteka ugovorenog roka završetka.

(2) Ugovorna kazna se neće obračunavati ukoliko je zbog prekoračenja došlo zbog više sile, krivice Naručitelja ili nekih drugih opravdanih razloga.

(2) Ukupan iznos ugovorne kazne ne može preći 10% vrijednosti ugovora bez PDV-a.

X OBAVEZE NARUČIOCA

Član 16.

Naručilac se obavezuje da:

- (1) izvrši obaveze iz člana 5. Ugovora – Uslovi i način plaćanja,
- (2) obezbijedi potrebna isključenja kontaktne mreže kako bi omogućio Izvođaču bezbjedan rad, u skladu sa tenderskom dokumentacijom,
- (3) omogućiti Izvođaču nesmetan ulazak mjestu izvođenja radova,
- (4) blagovremeno uvede Izvođača u posao i posjed o čemu se sastavlja zapisnik koji potpisuju ovlašteni predstavnici Naručioca i Izvođača,
- (5) odluči o zahtjevu Izvođača o podugovaraču u roku od 15 dana od dana zaprimanja zahtjeva,
- (6) da preda Izvođaču investiciono tehničku dokumentaciju koja je definisana u tenderskoj dokumentaciji i da se sačini zapisnik o primopredaji investiciono-tehničke dokumentacije;
- (7) da obezbijedi imenovanje Komisije za interni tehnički pregled i da isti organizuje,
- (8) odredi stručna lica koja će vršiti nadzor nad izvođenjem radova i koja će ovjeravati dokumentaciju, i o tome u dogovorenom roku obavijesti Izvođača
- (9) da u roku od trideset (30) dana računajući od dana dostavljanja izvedbenog projekta za devet tramvajskih stajališta, izvedbenog projekta optičkog kabla i izvedbenog projekta sistema elektronske naplate karata sa projektom upravljanja javnim gradskim prevozom od strane Izvođača, izvrši internu reviziju i u pisanoj formi obavijesti Izvođača da ima/nema primjedbi,
- (10) obavlja sve radnje za koje je po ovom ugovoru direktno zadužen.

XI OBAVEZE IZVOĐAČA:

Član 17.

Izvođač se obavezuje da:

- (1) obezbijedi urednu realizaciju Ugovora, štiti interese Naručioca, te ga obavještava o toku realizacije ugovora,
- (2) blagovremeno dostavi finansijske garancije iz člana 6. ovog Ugovora,
- (3) ugovorene radove izvrši u skladu sa tehničkom dokumentacijom, važećim tehničkim propisima, standardima i preporukama i u skladu sa instrukcijama Nadzornog organa,
- (4) sve ugovorene radove izvrši u obimu i kvalitetu prema ugovoru pridržavajući se ugovorenih rokova za izvođenje radova,
- (5) odgovara za kvalitet izvršenih radova i za kvalitet materijala koji je upotrebljen prilikom izvođenja radova,
- (6) u toku trajanja garantnog perioda od 24 mjeseca po potpisivanja Zapolnika o primopredaji odgovara za sve materijalne i nematerijalne štete, nastale Naručiocu i trećim licima krivicom Izvođača/bilo koga člana konzorcija, kao i sve štete nastale od opasne stvari u vlasništvu Izvođača i opasne djelatnosti koje izvršava Izvođač, tokom izvođenja radova, a koje su predmet ovog ugovora,
- (7) snosi punu odgovornost za realizaciju kompletnog ugovora, bez obzira na dio koji je podugovorom prenio na podugovarača, članovi Konzorcija solidarno odgovaraju za izvršenje svih obaveza iz ovog Ugovora,
- 8) podugovarače angažovane za izvođenje predmetnih radova mijenja samo uz saglasnost Naručioca, a ukoliko takva saglasnost izostane u roku od deset dana od upućenog zahtjeva, smatra se da je ista data,
- (9) blagovremeno, i u skladu sa prihvaćenim rokovima, ispunjava finansijske obaveze prema angažovanim podugovaračima,
- (10) izvrši poslove privremenog uvoza i izvoza opreme i alata potrebnog za izvođenje radova (u slučaju stranog Izvođača),
- (11) obezbijedi svu potrebnu opremu, alat, materijal i kvalifikovanu radnu snagu za izvođenje predmetnih radova,
- (12) snosi sve troškove izrade pristupnih puteva i odgovara za sve štete koje nastanu u toku izvođenja radova, osim neizbježnih šteta i šteta koje nastanu zbog radnji ili propusta Naručioca,
- (13) odredi stručna lica koja će rukovoditi izvođenjem radova za sve faze,
- (14) da imenuje jednog ili više rukovodioca radova na izvođenju građevinskih radova i funkcionalnog ispitivanja, i o tome obavijesti Naručioca,
- (15) izvrši prijavu gradilišta nadležnom organu u skladu sa Zakonom i podzakonskim aktima i da vodi građevinsku knjigu i građevinski dnevnik, a iste moraju biti obostrano i svakodnevno potpisane od strane ovlaštenih lica Naručioca i Izvođača,
- (16) dokumentaciju iz prethodne tačke Izvođač je obavezan da ima na gradilištu,
- (17) na objektu preduzima sve mjere radi obezbjeđenja sigurnosti objekta i radnika koji izvode radove,
- (18) omogućiti nadzornom organu stalni nadzor nad radovima i kontrolu količina i kvaliteta upotrijebljenog materijala,
- (19) da obavi sva funkcionalna ispitivanja potrebna za dovodenje objekata, opreme i softvera u funkcionalno stanje i da o istim izradi odgovarajuće Izvještaje, kako bi bili obavljene interni i tehnički pregled i pušteni u rad unutar postojećeg sistema,
- (20) po završetku svih ugovorenih radova sa gradilišta ukloni preostali materijal, opremu, sredstva za rad, te ga očisti od građevinskog i drugog otpada,
- (21) izradi tehničku dokumentaciju u skladu sa tenderskom dokumentacijom,
- (22) da izrađen izvedbeni projekat za devet tramvajskih stajališta, izvedbeni projekat optičkog kabla i izvedbeni projekat sistema elektronske naplate karata sa projektom upravljanja javnim gradskim prevozom, dostavi u sjedište Ugovornog organa radi interne revizije od strane Naručioca,
- (23) da po izvršenoj internoj reviziji izvedbenog projekta za devet tramvajskih stajališta, izvedbenog projekta optičkog kabla i izvedbenog projekta sistema elektronske naplate karata sa projektom upravljanja javnim gradskim prevozom izvrši eventualne izmjene projekta,
- (24) organizuje reviziju izvedbenog projekta za devet tramvajskih stajališta, izvedbenog projekta optičkog kabla i izvedbenog projekta sistema elektronske naplate karata sa projektom upravljanja javnim gradskim prevozom, odobrenog od strane Naručioca, preda revidentu nadležnom za reviziju te snosi troškove revizije,

(25) da po izvršenoj reviziji izvedbenih projekata od strane revidenta nadležnog za reviziju izvrši eventualne izmjene projekta,

(26) Naručiocu obezbijedi i preda ateste, licence i Projekat izvedenog stanja u 4 štampana i tvrdo koričena primjerka i 4 primjerka u elektronskoj formi u pdf i dwg formatu na CD/DVD, sa svim potrebnim elaboratima i tehničkim podlogama i drugu dokumentaciju koja je neohodna za dalje održavanje i upotrebu objekta, zavisno od definisanih zahtjeva u tenderskoj dokumentaciji, sva dokumentacija mora da bude na jednom od službenih jezika u BiH,

(27) Izvođač je obavezan da izvrši obuku osoblja Naručioca za korištenje i održavanje ugrađene opreme koja je predmet ovog Ugovora kao i da preda Naručiocu pisana uputstva za korištenje i održavanje predmetne opreme na jednom od lokalnih jezika u BiH.

XII INTERNI TEHNIČKI PREGLED, TEHNIČKI PREGLED I PRIMOPREDAJA OBJEKTA

Član 18.

(1) Izvođač će odmah po završetku radova, u pisanoj formi obavijestiti Naručioca, da su sve ugovorene obaveze završene i da su objekti i sva oprema kao i softverska podrška za funkcionisanje sistema upravljanja saobraćajem i kontrole naplate spremni za interni tehnički pregled.

(2) Izvođač je dužan 5 /pet/ dana prije konačnog završetka radova, Naručiocu uputiti pismeni zahtjev za formiranje komisije, a Naručilac je dužan u roku od 7 /sedam/ dana po pismenom zahtjevu Izvođača formirati komisiju i zakazati tehnički prijem i primopredaju predmetnih radova.

(3) Ovlašteni predstavnici/Komisija/ Naručioca uz prisustvo nadzornog organa i Izvršioca vrše interni tehnički pregled objekata i sve opreme, kao i softverske podrške za funkcionisanje sistema upravljanja saobraćajem i kontrole naplate, te tehničke dokumentacije. Ako se prilikom internog tehničkog pregleda uoče nedostaci Naručilac će, uz konsultaciju sa Izvođačem, odrediti Izvođaču primjereni rok za otklanjanje svih uočenih nedostataka. Nakon završenog internog tehničkog pregleda sastaviće se Zapisnik o internom tehničkom pregledu. Nakon otklanjanja nedostataka utvrđenih tokom internog tehničkog pregleda i dostavljanja Izjave Izvođača o otklanjanju nedostataka sa internog tehničkog pregleda, Naručilac će sačiniti Izvještaj o otklanjanju nedostataka po Zapisniku o internom tehničkom pregledu objekata i sve opreme, kao i softverske podrške za funkcionisanje sistema upravljanja saobraćajem i kontrole naplate .

XIII USLOVI PRELASKA RIZIKA I OSIGURANJA OPREME NA NARUČIOCA

Član 19.

(1) Ugovorne strane ugovaraju INOTERMS 2000 pravilima dostave i to da se isporuka opreme koja je predmet ovoj pojedinačnog ugovora za fazi I, vrši na paritetu DDP Sarajevo.

(2) Svi rizici za transporta, primopredaju, ugradnju isporučene opreme pokriva Izvođač radova, te da rizik prelazi na naručioca u trenutku potpisivanja Zapisnika o primopredaji i Zapisnika o ugradnji kada svi rizici i osiguranje prelaze sa Izvođača na Naručioca i to na:

- izvedene građevinske radove nakon potpisivanja okončane situacije po ovom ugovoru;
- ugrađenu opremu na stajalištu nakon potpisivanja Zapisnika o primopredaji;
- opremu ugrađenu u tramvaje u trenutku potpisivanja Zapisnika o ugradnji opreme

(3) Nadzorni organ je dužan odmah po prijemu pregledati svu dostavljenu opremu te u slučaju uočenih nedostataka obavijestiti odmah Izvođača bez odlaganja, a najkasnije u roku od 3 dana pod prijetnjom gubitka prava.

U obavijesti o nedostatku Nadzor može:

- postupiti u skladu sa članom 10. ovog ugovora i / ili
- odmah obavijestiti Naručioca o uočenim nedostacima.

Naručilac može, bez obzira na prigovore nadzora naložiti ugradnju takvog materijala.

(4) Ugovorne stranu su dužne držati se rokova za prigovore i naloge koji su predviđeni ovim ugovorom.

(5) Izvođač potpisivanjem ovog ugovora garantuje da u trenutku isporučivanja opreme i izvođenja radova nije zatajio ili prešutio bilo koji sakriveni nedostatak ili manu za isporučenu i ugrađenu robu, odnosno za izvedene radove.

(6) Ukoliko se utvrdi da su isporučena i ugrađena roba, kao i izvedeni radovi imale sakrivene nedostatke ili mane za koje je Izvođač znao ili morao znati, Naručilac stiče pravo da kroz aktiviranje bankovne garancije izvrši naplatu nastale štete, te ukoliko nastala šteta prelazi iznos bankovne garancije, Naručilac stiče pravo da naplatu štete izvrši do visine stvarno utvrđene štete.

Član 20.

(1) Ugovorne strane saglasno potvrđuju da će u slučaju ugradnje pojedinačne opreme u inventar tramvaja, koji se ne nalazi na gradilištu koji kontrolira Izvođač, Zapisnik o primopredaji takve robe će se sačiniti odmah po ugradnji te opreme i od tada rizik nastanka štete prelazi na Naručioca.

(2) Ukoliko je Naručilac preuzeo opremu u toku izvođenja Projekta u skladu sa ovim članom, za nastalu štetu na takvoj opremi Naručilac odgovara po principu objektivne odgovornosti.

(3) Ukoliko nastane šteta na robi koju je preuzeo Naručilac i time bude ugrožena daljnja realizacija projekta, Naručilac je dužan omogućiti Izvođaču nastavak radova.

XIV AUTORSKA PRAVA NAD SOURCE CODOM

Član 21.

(1) Ugovorne strane su saglasne da prava autora nad *Source code*-om u trenutku zaključenja Ugovora ima Izvođač radova. Isti zadržava sva prava nad *Source code*-om do trenutka isteka garantnog perioda i isplate ugovorene cijene iz ovoga Ugovora.

(2) Istekom ovoga perioda Izvođač prenosi prava na korištenje i izmjenu *Source code*-a Naručiću uz obavezu da isti informiše o svakim izmjenama istog u roku od 60 dana od namjeravane izmjene, pod prijetnjom gubitka prava.

(3) Izvođač može naknadno dostaviti saglasnost da Naručilac distribuira prava korištenja i izmjenu *Source code*-a trećim licima.

(4) Ugovorne strane su saglasne da prava iz ovoga člana se prenose samo na Naručioca, i prestaju u slučaju da Naručilac izgubi pravni subjektivitet. Naručilac prava iz ovoga člana ne može prenositi na treća lica, niti u garantnom roku angažovati treća lica da održavaju, koriste ili na bilo koji način mijenjaju *Source code* koji je predmet ovoga Ugovora.

(5) U slučaju raskida ovoga ugovora nakon što je instaliran i pušten u rad bilo koji oblik korištenja *Source code*-a ili njegovih modifikacija, a ugovor se raskine, odredbe iz ovoga člana ostaju na snazi do potpisivanja novog ugovora o korištenju autorskih prava nad *Source Code*-om.

XV OBIM RADOVA

Član 22.

(1) Izvođač je obavezan da realizuje Ugovor u potpunosti kako bi obezbijedio funkcionalnost izvedenih objekata i sve opreme, kao i softverske podrške za funkcionisanje sistema upravljanja saobraćajem i kontrole naplate, čak iako određena sitna oprema, materijali, radovi i usluge potrebne za funkcionalnost nisu navedeni u tehničkim specifikacijama i obrascu za cijenu ponude, te ima pravo od Naručioca zahtijevati plaćanje istih uz obaveznu saglasnost Nadzora.

(2) Ukoliko se u toku realizacije ovog ugovora pojavi potreba za izvođenjem naknadnih radova (radovi koji nisu ugovoreni i nisu nužni za ispunjenje ugovora), Izvođač je dužan da zastane sa tom vrstom radova i da pismeno obavijesti Naručioca, nakon čega će Naručilac ukoliko zahtijeva da se isti izvedu, postupiti u skladu sa Zakonom o javnim nabavkama i drugim relevantnim propisima.

XVI GARANTNI I POSTGARANTNI ROK

Član 23.

(1) Garantni rok za svu ugrađenu opremu, isporučene licence i izvedene radove je 24 mjeseca, računajući od dana obostrano potpisanog Zapisnika o kvalitativnom prijemu - puštanju opreme/sistema u rad bez primjedbi, sa non-stop podrškom 24h / 7dana / 365 dana. Garancija mora minimalno uključivati popravku neispravnog HW i otklanjanje SW grešaka.

Naručilac mora prije isteka garantnog roka izvršiti inspekcijski pregled svih objekata, u vezi s tim sačiniti zapisnik i u pisanoj formi zahtijevati od Izvođača da otkloni sve utvrđene greške i manjkavosti.

(2) Ukoliko se u toku garantnog roka pojavi potreba za zamjenom hardware-skog ili software-skog dijela, obaveza izvođača je da u predviđenom roku obavi zamjenu bez ikakvih dodatnih troškova za naručioca na način da u što kraćem roku otkloni problem koji bi mogli uzrokovati zastoj bezkontaktnog sistema naplate i praćenja i upravljanja javnim prijevozom putnika te da omogući rješavanje problema i dovođenje u ispravno stanje opreme kao i njezino održavanje 365 dana u godini, 24 sata dnevno, 7 dana u sedmici (24x7x365), za vrijeme trajanja garancije, od dana puštanja u rad i verifikacije ispravnog stanja informacionog sistema.

(3) U slučaju da Izvođač ne otkloni nedostatke u zadatom roku, Naručilac može ugovoriti otklanjanje grešaka i manjkavosti sa drugim izvođačem, a za troškove teretiti Izvođača. Osim ako Izvođač dokaže da nije izvršio izmjene i popravke zbog postojanja više sile i / ili drugih objektivnih okolnosti.

(4) Izvođač mora na pisani zahtjev Naručioca i po uputstvima nadzornog organa, istražiti sve manjkavosti i kvarove. Troškovi istraživanja terete Izvođača, osim u slučaju kada je za ustanovljene kvarove i greške odgovoran Naručilac. U slučaju da je za to odgovoran Naručilac, svi troškovi padaju na njegov teret.

(5) Za opremu vrijede garantni rokovi proizvođača koje nudi Izvođač, a koji ne može biti manji od garantnog roka utvrđenog u stavu 1. ovog člana. Izvođač će u utvrđenom roku i o svom trošku otkloniti nedostatke koji se pokazuju za vrijeme garantnog roka na opremi ili opremu zamjeniti novom, u kom slučaju garantni period se produžava za onoliko koliko je Naručilac bio lišen upotrebe, odnosno u slučaju zamjene opreme novom, garantni rok počinje teći iznova od zamjene.

(6) Članovi Konzorcija Naručiocu su solidarno odgovorni za kvalitetu realizacije predmeta ugovora u garantnom roku. U slučaju da u garantnom roku dođe do prestanka rada, odnosno stečaja ili likvidacije nad članom Konzorcija, odgovornost preuzimaju pravni sljedbenici člana Konzorcija sa ostalim članovima Konzorcija. Ukoliko ne postoji pravni sljedbenik člana Konzorcija koji je prestao sa radom, preostali članovi Konzorcija odgovaraju Naručiocu solidarno za kvalitetu predmeta ugovora u garantnom roku.

(7) Postgarantni rok za svu ugrađenu opremu i isporučene licence je najmanje 5 godina, a počinje od datuma isteka garantnog perioda. Ukoliko se u toku postgarantnog perioda pojavi potreba za zamjenom hardware-skog ili software-skog dijela, obaveza Izvođača je da u predviđenom roku, na zahtjev Naručioca obezbijedi snabdijevanje potrebnim dijelovima

(8) Izvođač je obavezan da izvrši sve popravke i otkloni sve vidljive i skrivene nedostatke, na pisani zahtjev Naručioca koji će biti dostavljen Izvođaču najkasnije u roku do 30 dana po isteku garantnog roka. Zavisno od obima utvrđenih nedostataka Naručilac će, uz konsultaciju sa Izvođačem, odrediti primjeren rok za njihovo otklanjanje.

XVII KOMUNIKACIJA

Član 24.

(1) Ugovorne strane su dužne u roku od 10 (deset) dana imenovati jednu, a najviše tri odobe sa kojima će se vršiti komunikacija između Izvođača i Naručioca. U slučaju da do imenovanja ovih osoba ne dođe, strana koja nije imenovala snosi odgovornost za štetu.

(2) Osim ako se ne radi o pukom vođenju procedure i/ili saradnje Strana na tehnološkom i/ili tehničkom nivou u skladu s odredbama ovog ugovora, sva obavještenja u vezi s ovim ugovorom će biti sačinjena u pisanoj formi od strane jednog ili više zastupnika ovlaštenih da to obave (uz neophodan potpis ovlaštene osobe koja predstavlja kompaniju) i poslana primaocu preporučenim pismom na adresu

koja je navedena dole ili na adresu koju druga strana pismeno precizira te preporučenim pismom uz pozivanje na ovu odredbu ugovora.

(3) Adrese za sva obavještenja prema odredbama ovog ugovora su:

Za Izvođača:

BS Telecom Solutions d.o.o. Sarajevo

Kontakt osoba 1

Na ruke gosp. Mehmed Ždralović

Funkcija: sistem inženjer

Adresa: Branilaca Sarajeva br. 20, 71000 Sarajevo

Tel: +387 33 636 786

Mobilni tel: +387 62 898 011

e-mail: mehmed.zdralovic@bstelecom.ba

Kontakt osoba 2

Na ruke gosp. Halid Ćenanović

Funkcija: šef Sektora za tehničku podršku

Adresa: Branilaca Sarajeva br. 20, 71000 Sarajevo

Tel: +387 33 636 786

Mobilni tel: +387 62 898 007

e-mail: halid.cenanovic@bstelecom.ba

Za Naručioca:

„Ministarstvo saobraćaja Kantona Sarajevo“

Kontakt 1

Na ruke gosp. Kukan Muamera

Funkcija: Pomoćnik ministra

Adresa: ul. Reisa Džemaludina Čauševića br.1

Telefon: 033/562-152

e-mail: kukan_muamer@hotmail.com

Kontakt 2

Na ruke gosp. Hota Emira

Funkcija: Stručni savjetnik za ekonomske poslove

Adresa: ul. Reisa Džemaludina Čauševića br.1

Telefon: 033/562-249

e-mail: emir.hota@ms.ks.gov.ba

XVIII VIŠA SILA

Član 25.

(1) Viša sila predstavlja situacije koje su neočekivane, koje se ne mogu izbjeći, spriječiti ili koje Ugovorne strane ne mogu staviti pod kontrolu, čak iako su zahtijevane mjere predostrožnosti poduzete, ili gdje rezultirajuća situacija u znatnom dijelu ili u cjelini negativno utiče na izvršavanje obaveza navedenih u ugovoru. To su situacije koje uključuju ratove, bolesti, požare i prirodne katastrofe kao što su poplave, zemljotresi, klizišta, opšte epidemije, objave pune ili djelomične mobilizacije, široko rasprostranjena djela nasilja, sabotaze, štrajkovi i koje ugovorne strane onemogućavaju u izvršenju ugovornih obaveza.

(2) Nemogućnost bilo koje Ugovorne strane da ispuni bilo koju od svojih ugovornih obaveza neće se smatrati raskidom ugovora ili neispunjavanjem ugovorne obaveze, ukoliko se takva nemogućnost pojavi usljed dejstva više sile, s tim da je ugovorna strana koja je pogođena takvim događajem:

a) preduzela sve potrebne mjere predostrožnosti i potrebnu pažnju, kako bi izvršila svoje obaveze u rokovima i pod uslovima iz ovog Ugovora, i

b) obavijestila drugu ugovornu stranu na način koji je u datoj situaciji jedino moguć, odmah po nastanku više sile, a najkasnije u roku od 3 (tri) dana od pojave takvog događaja o preduzetim mjerama na otklanjanju štetnih posljedica dejstva više sile.

(3) Usljed dejstva više sile ugovorne obaveze će se prekinuti, te nakon prestanka dejstva više sile ugovorne strane će kroz zaključenje aneksa ugovora utvrditi naknadni rok za izvršenje ugovornih obaveza i otklanjanje drugih posljedica dejstva više sile na ugovorne odnose i realizaciju ugovora.

(4) Ako Ugovorna strana koja je pogođena djelima više sile ne obavijesti drugu Ugovornu stranu najkasnije u roku od 15 (petnaest) dana od dana kada je saznala za nastalu situaciju i u roku od 1 (jednog) mjeseca od nastanka djelovanja više sile i ako ne dokumentuje situaciju, druga Ugovorna strana zadržava pravo da ne dodijeli vremensko produženje, da raskine Sporazum i da traži naknadu štete i gubitaka od pogođene Ugovorne strane.

XV RASKID UGOVORA

Član 26.

(1) Pravo na raskid ugovora zadržavaju obje ugovorne strane.

(2) Ukoliko Izvođač u ugovorenom roku ne izvrši svoje obaveze iz Ugovora, Naručilac će dati naknadni primjereni rok za izvršenje obaveza koji ne oslobađa Izvođača obračuna ugovorne kazne iz člana 15. ovog Ugovora.

(3) Ako Izvođač ne izvrši obaveze iz Ugovora ni u naknadnom roku, Ugovor se raskida, uz obavezu Izvođača da Naručiocu nadoknadi štetu koju je pretrpio zbog neispunjenja obaveza iz Ugovora.

(4) Svako kršenje ugovornih odredbi ovog ugovora od strane Izvođača (rokovi, količine, kvalitet radova, izvođenje radova bez prethodne saglasnosti Nadzornog organa i dr.) povlači bezuslovno aktiviranje bankovne garancije za uredno izvršenje ugovora sa klauzulom plativo na prvi pisani poziv korisnika garancije i bez prava prigovora.

XVI ZAVRŠNE ODREDBE

Član 27.

Ukoliko Izvođač primijeti grešku ili nedostatak tehničke prirode u nekom dokumentu, a koji je od strane Naručioca pripremljen radi korištenja u izvođenju radova, on će odmah obavijestiti Naručioca o takvoj grešci i / ili nedostatku, a radi otklanjanja iste, u suprotnom ne odgovara za posljedice takve greške, a stiče pravo na naknadu štete, ukoliko ista nastupi.

Član 28.

(1) Izvođač nema pravo zapošljavati u svrhu izvršenja ovog ugovora fizička ili pravna lica koja su učestvovala u pripremi tenderske dokumentacije ili su bila u svojstvu člana ili stručnog lica koje je angažovala Komisija za nabavke, najmanje šest mjeseci po zaključenju ugovora, odnosno od početka realizacije ugovora.

(2) Ovaj Ugovor je zaključen i stupa na snagu danom potpisa obje ugovorne strane.

(3) Ugovorne strane su saglasne da za sve što u ovom Ugovoru nije precizirano vrijede odredbe Zakona o obligacionim odnosima.

(4) Sve eventualne sporove, ugovorne strane će rješavati sporazumno, u duhu dobrih poslovnih odnosa u direktnim pregovorima.

(5) Ukoliko se sporazumno rješenje ne postigne, za rješavanje sporova nadležan je sud u Sarajevu.

(6) Ugovor je sačinjen u 6 (šest) istovjetnih primjeraka, 4 (četiri) primjerka zadržava Naručilac, a 2 (dva) primjerka su za Izvršioca.

(7) Sastavni dio ovog Ugovora čine:

- Okvirni sporazum br: 04-14-27935-11 od 19.10.2018. godine

- usaglašeni premjerom i predračun radova odnosno ponuda izvođača radova zaprimljena pod br. 04-14-31023 od 30.08.2018. godine

(8) Sastavni dio ovog ugovora od trenutka kada se isti potpišu, čine i

- građevinski dnevnik radova
- građevinska knjiga

- sva druga obostrano usaglašena i ovjerenjena dokumentacija koja nastane tokom izvođenja radova.
- dopisi koji su upućeni u skladu sa ugovorom.

IZVRŠILAC
I
R

/Mirza Karahasanović



Broj: 04-14-17935-12
Sarajevo, 19.10.2018. godine.

NARUČILAC
MINISTARSTVO SAOBRAĆAJA



Mirza Karahasanović

Broj: 04-14-27935-12
Sarajevo, 19.10.2018. godine.

Mirza

